

**Referendum iwwer den zweeten Deel vun der  
Verfassungsreform:  
25.000 Ennerschrëften sinn néideg!**

*Pressematdeelung vum 16. Februar 2022*

Vum 2. bis de 25. Mäerz hunn d'Lëtzebuerger d'Méiglechkeet fir sech op hirer Gemeng an eng Lëscht anzeden, fir ze verlaangen, datt den zweeten Deel vun der Verfassungsreform soll engem Referendum virgeluecht ginn. D'ADR seet deene couragéierte Leit Merci, déi mat hirem Bréif un de Premierminister de Wee fir dës demokratesch Prozedur fräigemaach hunn. Si hofft, datt vill Bierger vun hirem Recht Gebrauch maachen an datt déi 25.000 Ennerschrëften, déi fir e Referendum néideg sinn, bei dësem zweeten Ulaf zesummekommen.

D'ADR verlaangt, datt, aus Respekt virun dëser Referendumsprozedur déi bis zum 25. Mäerz leeft, iwwer kee weidert Kapitel vun där véierdeeleger Verfassungsreform an der Chamber ofgestëmmt gëtt. Sollte 25.000 Bierger e Referendum froen, misst jo souwisou nei iwwerluecht ginn, wéi mat deene verschiddene Deeler vun der Reform misst ëmgaange ginn.

D'ADR kritiséiert, datt d'Period vun der Aschreiwung op d'Lëschte vum 2. bis de 25. Mäerz mat nëmmen dräi Wochen extrem kuerz ass. D'Regierung weist domat op en Neits, datt si de Referendum net wëll an datt si et de Leit wëll esou schwéier wéi méiglech maachen fir vun hiren demokratesche Rechter Gebrauch ze maachen.

Et ass ze hoffen, datt wéinstens d'Gemenge mat ëmfaassender Informatioun un hir Matbierger a mat kamouden Öffnungszäiten alles maachen, fir de Wäert vun dëser demokratescher Prozedur ze ënnersträichen.

Leider ass et nach ëmmer net méiglech, datt d'Lëtzebuerger am Ausland, wéi z.B. d'Studenten, kënnen iwwer eng online-Prozedur mat ofstëmmen. Op eng Gesetzesinitiativ an dem Sënn vun der ADR hat d'Regierung direkt negativ reagéiert. D'ADR verlaangt awer virun, datt Lëtzebuerg déi Prozedure moderniséiert an datt et an Zukunft muss méiglech gi fir e Referendum och online ze ënnerstëtzen.